


TEZAU LITURGIC
26 AUGUST

SLUJBA
SF.PREOT-
MĂRTURISITOR
ROMAN MEDVED
DE LA
MOSCOVA



MOSCOVA, 2000



Служба священноисповеднику Роману Московскому

На велицей вечерни

На Господи, возвах: стихирь на 8, глас 2.

Подобен: Киими похвальными венцы:

Приидите, вернии, / восхвалим исповедника,
Романа мужественнаго, / в последняя лета
явльшагося, / Христа не отвергшагося / и
многая страдания претерпевшаго. / Ныне в раи
сладоу со святыми пребывающаго // и
молящагося о спасении душ наших.

Скорбьми, яко злато в горниле, очистився, /
достойн сосуд Святаго Духа явился еси / и
силою Божиею козни вражия сокрушил еси, /
Романе, исповедниче Христов. / Ныне же
Престолу Божию предстоиши // и молишися
прилежно о почитающих тя.

Страх Господень, иже есть начало премудрости,
/ в сердце твоем стяжав, / глаголы жизни
вечныя возвещал еси / и многая люди ко Христу
привел еси, / отче Романе премудре. / Ныне же,
пребывая в Небесных кровех, // молися о
почитающих святую память твою.

Слава, глас 6:

Попечение имея о пастве твоей, / яко отец
чадолюбивый, / словом и делом наставляя еси ю.
/ Темже молим тя, / настави нас на путь
правый / небовосходною стезею шествовати / и
Царствия Небеснаго достигнути, / идеже вкупе
с тобою сподобимся / прославляти Отца и Сына
и Святаго Духа, // Троицу Единосущную и
Нераздельную.

И ныне, Богородичен, глас тойже:

Кто Тебе не ублажит, Пресвятая Дево? / Кто ли
не воспоеет Твоего Пречистаго Рождества? /
Безлетно бо от Отца возсиявый Сын
Единородный, / Тойже от Тебе Чистыя пройде, /
неизреченно воплощься: / естеством Бог Сый, /
и естеством быв Человек нас ради; / не во двою
лицу разделяемый, / но во двою естеству
неслитно познаваемый. / Того моли, Чистая
Всеблаженная, // помиловатися душам нашим.

Вход. Прокимен дне. Чтения три.

Пророчества Исаиина чтение:

Тако глаголет Господь: вси языцы собращася
вкупе, и соберутся князи от них. Кто возвестит
сия в них; или яже от начала, кто слышана
сотворит вам; да приведут свидетели своя, и
оправдятся, и да услышат, и да рекут истину.

Будите ми свидетели, и Аз свидетель, глаголет Господь Бог, и Отрок Егоже избрах, да познаете и веруете Ми, и разумеете, яко Аз Есмь: прежде Мене не бысть ин Бог, и по Мне не будет. Аз есмь Бог, и несть разве мене спасаая. Аз возвестих, и спасох, уничижих, и не бе в вас чуждий. Вы Мне свидетели, и Аз Господь Бог, и еще от начала Аз есмь: и несть от рук Моих избавляя, сотворю, и кто отвратит то; сице глаголет Господь Бог, избавляя вас Святыи Израилев.

Премудрости Соломоновы чтение:

Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнение. И в мале наказани бывше, великими благодетельствовани будут, яко Бог искуси я, и обрете их достойны Себе. Яко злато в горниле искуси их, и яко всеплодие жертвенное прият я. И во время посещения их возсияют: и яко искры по стеблию потекут. Судят языком, и обладают людьми, и воцарится Господь в них во веки. Надеющийся Нань разумеют истину, и вернии в любви пребудут Ему: яко благодать и милость в

преподобных Его, и посещение во избранных Его.

Премудрости Соломоновы чтение:

Праведницы во веки живут, и в Господе мзда их и попечение их у Вышняго. Сего ради примут царствие благолепия, и венец доброты от руки Господни, зане десницею покрывает я, и мышцею защитит их. Приимет всеоружие рвение свое, и вооружит тварь в месть врагом. Облечется в броня правды, и возложит шлем, суд нелицемерен. Приимет щит непобедимый преподобие: поострит же напрасный гнев во оружие: споборет же с ним мир на безумный. Пойдут праволучныя стрелы молниины, и яко благокругла лука облаков, на намерение полетят. И от каменометныя ярости исполнь падут грады, вознегодует на них вода морская, реки же потопят я нагло. Сопротив станет им дух силы и яко вихор развеет их, и опустошит всю землю беззаконие: и злодейство превратит престолы сильных. Слышите убо царие, и разумеите, навькните судии концев земли. Внушите держащии множества, и гордящися о народах языков, яко дана есть от Господа держава вам и сила от Вышняго.

Стихиры на литии, глас 1:

Яко странник, на земли пожил еси, / Романе досточудне, / и, ничтоже из привременных имети желая, / Христа, Божию Силу и Божию Премудрость, обрел еси, / Егоже свидетель истинный пред мучители явился еси / и, прошед воды искушения, воспел еси: // помощь моя от Господа, сотворшаго небо и землю.

Отвратив очи от суеты мира / и в путех заповедей Господних непорочно ходив, / глагол Давидов исполнил еси, / блаженне Романе досточудне, / темже, яко пастырь добрый, / паству твою добре упасл еси / и лютыя волки отгнал еси. / Ныне во ограде Небесней пребываеши // с новомученики и исповедники Российскими.

Слава, глас 6:

О верный и добрый слуго Господень, / святе Романе страдальче, / мучения бо претерпев, Небеса наследовал еси, / и, временно пострадав, вечно радуешься, / воистину блажен еси, / тленная бо оставль, нетленная восприял еси, / ныне же со ангелы ликуеши, // прославляя Троицу Единосущную и Нераздельную.

И ныне, Богородичен:

Не имамы дерзновения к Тебе, Христе, / за премногия грехи наша, / но молитвами

Богородицы и священноисповедника Романа // милостив буди нам, грешным.

На стиховне стихиры, глас 4.

Подобен: Яко добля:

Евангельскому сеятелю уподобився, / слово Божие в сердца людей сеял еси / и напитал еси я пищею присноживотною, / богомудре Романе, отче наш, / от Источника жизни, Христа, Бога нашего, // Егоже славословим во вся веки.

Стих: Пройдохом сквозе огонь и воду / и извел еси ны в покой.

Муки душевныя и телесныя подъял еси, / священноисповедниче Романе, / Христа ради Подвигоположника, Спаса нашего, / возлюбившаго мир / и предавшаго Себе на смерть, // Егоже благословим во вся веки.

Стих: Блажени живущи в дому Твоем, / в веки веков восхвалят Тя.

Усладил еси сердца верных / словесы богомудрых учений твоих, / отче Романе приснопамятне, / ныне же, в Небесных кровех водворяяся, / молися ко Святей Троице // в вере, надежди и любви утвердиться нам.

Слава, глас 6:

Надеждею на вечную жизнь укрепляемь, / о телеси твоем небрегл еси, / отче Романе, исповедниче Христов, / и, терпя страдания,

радовался еси, // благодарение и славу Богу
возсылая.

И ныне, Богородичен, глас тойже:
Творец и Избавитель мой, Пречистая, / Христос
Господь, из Твоих ложесн прошед, / в мя
оболкийся, / первыя клятвы Адама свободи. /
Темже Ти, Всечистая, / яко Божии Матери же и
Деве, / воистину вопием немолчно: / радуйся
ангельски, радуйся Владычице, /
предстательство и покрове, // и спасение душ
наших.

Тропарь, глас 4:

Заветы Кронштадтскаго пастыря исполняя, /
Христу усердно последовал еси / и, яко отец
чадолюбивый, / паству твою, блаженне Романе,
добре упасл еси. / Во дни же гонений лютых на
Церковь Русскую / твердость во исповедании
веры показал еси. / Ныне же, Престолу Божию
предстоя, / молися Господу, усердно молим тя: /
Православию в земли нашей утвердиться, /
отечеству в мире пребывати // и душам нашим
спастися.

На утрени

По 1-м стихословии седален, глас 1:

Яко крин сельный, процветший посреде терния,
/ явися житие твое посреде нечестиво живущих,
свiate Романе, / подвигом бо добрым
подвизався, течение жизни скончал еси. / Ныне
поминай нас во Царствии Небеснем.

Слава, и ныне, Богородичен:

Явилася еси, Владычице Богородице, Дверь, /
Еюже сниде в мир Христос Бог наш. / Темже
молим Тя: / отверзи нам двери милости Твоея.

По 2-м стихословии седален, глас 2:

Кронштадтскаго пастыря наставника имея, /
яко послушливый сын повиновался еси ему,
Романе досточудне, / и, якоже той, принесение
безкровныя жертвы Христовы во главу
пастырскаго служения поставил еси. / Ныне же,
вкупе с ним Престолу Божию предстоя и Пасхи
вечныя наслаждаяся, / моли о земнем Отечестве
твоом и спасении душ наших.

Слава, и ныне, Богородичен:

Волны напастей восташа на ны, Дево, / в нихже
люте обуреваемы, бедствуем, / Ты же, о
Богомати, простри державную Твою десницу / и
из глубины зол в пристанище милости Твоея
введи, Владычице.

Величание

Величаем тя, / святой священоисповедниче
Романе, / и чтим святую память твою, / ты бо
молиши за нас / Христа Бога нашего.

Псалом избранный:

Бог нам Прибежище и Сила.

Господи, воздвигни силу Твою и прииди, во еже
спасти ны.

Глаголах о свидениих твоих пред цари и не
стыдяхся.

Вси языцы обыдоша мя, и именем Господним
противляхся им.

Тебе ради умерщвляемся весь день, вменихомся,
яко овцы заколения.

Крепость моя и пением мое Господь, и бысть мне
во спасение.

По полиелеи седален, глас 6:

Горняго града Небеснаго Иерусалима взыскуя, /
телесныя болезни, темничная заточения и
горькия работы / мужественне претерпел еси,
страдальче Романе, / памятуя, яко многими
скорбьми подобает внити в Царствие Божие. /
Помози и нам, угодниче Христов, подвигом
добрым подвизатися, / течение жизни достойно
скончати, веру соблюсти / и венцем правды от
Христа Бога увенчатися.

Слава, и ныне, Богородичен:
Ковчег свят явилася еси, Пресвятая Дево,
вместивши невместимаго Бога. / Помози и нам,
Всемиловитая Владычице, / покаяние истинное
о гресех наших принести и слезами души
очистити, / да сподобимся от Бога милости в
день судный.

Степенна, 1-й антифон 4-го гласа.
Прокимен, глас 4: Честна пред Господем /
смерть преподобных Его.
Стих: Что воздам Господеви о всех, яже воздаде
ми?

Евангелие от Луки, зачало 64.
По 50-м псалме стихира, глас 6:
Мужайся, Церковь Христова, / и державствуй
над всею борющимися, / Христови бо друзи, /
предстояще пред престолом Божиим, / молебней
руце своя выну простирают / и молитву к Богу о
тебе возсылают, / с ними же вкупе и святой
Роман исповедник, // земли московския
похвала и украшение.

Канон Богородицы со ирмосом на 6
и святаго на 8, глас 6.

Песнь 1

*Ирмос: Яко по суху, пешешествовав Израиль /
по бездне стопами, / гонителя фараона / видя*

*потопляема, // Богу победную песнь поим,
вопяше.*

Предивный отче Романе, твердый исповедниче
Христов, / помолися Господу Иисусу, да подаст
ми разум, / воспети память твою дерзающему.
Божественное разумение от Духа Святаго
прием, / евангельская словеса на скрижалех
сердца твоего написал еси, богомудре, / и был
еси пастырь добрый, / являя верным образ
словом, житием, любовью, духом, верою и
чистотою.

Яко древо, насажденное при исходящих вод, /
на земли процвел еси, Романе досточудне, / и
плоды добродетелей терпением твоим возрастил
еси. / Ныне же, Престолу Божию предстоя, /
помози нам в вере, надежди и любви
утвердиться.

Богородичен: Яко же блудный сын, аз, грешный,
душу плоти поработив, / но, Боже и Спасе мой,
/ молитвами Богородицы свободи мя сего плена
греховнаго, / яко древле Израиля от работы
египетския.

Песнь 3

*Ирмос: Несть свят, / якоже Ты, Господи, Боже
мой, / вознесый рог верных Твоих, Блаже, / и
утвердивый нас на камени // исповедания
Твоего.*

На камени исповедания утвердив стопы твоя,
славне Романе, / безбожных леств отринул еси /
и, темничная заточения претерпев, / веру
Христову соблюл еси.

Помазався елеем благодати, славне Романе, /
явился еси ратоборец сопротив диавола и
аггелов его. / Темже, победив их силою Духа
Святаго, / приял еси венец неувядаемый от
Десницы Божией во Царствии Небеснем.

Огнем Божественных ревности возгревша, /
попалил еси плевелы бесовския, отче Романе, /
и, пшеницу словес Евангельских в сердце твоём
возрастив, / Христу сторишный плод принесл
еси.

Богородичен: Блаженству девственников не
поревновав, аз окаянный, / оскверних ризу
крещения своего и удалихся благодати Твоея,
Аггче Божий, / молитвами Богородицы даждь
ми исправление живота моего.

Седален, глас 3:

Крест на рамена твоя возьми, / мужественно
последовал еси Христу, Романе
священноисповедниче, / и, не обращая сердцем
твоим вспять, / мнози скорби и болезни от
безбожных претерпел еси. / Ныне же, во славе
со всеми святыми пребывая, / поминай нас,
память твою благочестно почитающих.

Слава, и ныне, Богородичен:

Оскверних тело и омрачих ум аз, окаянный, / да
не низведен буду по грехом моим в преисподняя
земли, / молитвами Богородицы, Едине
Человеколюбче.

Песнь 4

*Ирмос: Христос моя Сила, / Бог и Господь, /
честная церковь / боголепно поет, взывающи:
// от смысла чиста о Господе празднующи.*

Апостольски мертвенность Христову в себе нося,
/ чашу страданий с терпением до конца испил
еси, святе. / Ныне же сияеши во славе Небесней
с новомученики и исповедники Российскими.

Розга многоплодная Лозы Христовы явился еси,
Романе досточудне, / гроздия бо добродетелей в
страданиях и болезнях возрадив, / вино
милости нам ныне источаеши и молишися о
душах наших.

Христа имея в сердце твоём, / Тому
непрестанно молился еси, досточудне, / Егоже
силою укрепляемь, от безбожных гонения
претерпел еси. / Буди о нас молитвенник
теплый, / память твою светло почитающих.

Богородичен: Острупися сердце мое язвами
греховными и лежу, яко же прокаженный. / Не
презри стенания моя, Богородице, / и спаси мя.

Песнь 5

*Ирмос: Божиим светом Твоим, Блаже /
утреннюющих Ти души любовью озари, молюся,
/ Тя ведети, Слове Божий, / истиннаго Бога, //
от мрака греховнаго зывающа.*

Жертву благоуханную непрестанная молитвы в
сердце твоём Богу приносил еси, / ум горе
возводя и трапезы духовная наслаждаяся. / Во
дни же гонений лютых на земли нашей, святе
исповедниче, / яко всеожжение богоприятное
всего себе Христу принесл еси.

Праведному Иосифу в благодушии и Иову
Многострадальному в терпении подражая, отче
Романе, / евангельски иго Христово смиренно
понесл еси, / сего ради обрел еси покой души
твоя.

Боговещанный учитель благочестия и чистоты
пастве твоей был еси, святе Романе, / обаче не
словом точию, паче житием твоим поучавый ю.
/ Темже и Христос, яко вернаго Своего раба, тя
прослави / и, яко правило веры и образ
исповедания, нам яви.

Богородичен: Буди нам Путеводительница,
Богородице Дево, / странствующим во
временней сей юдоли, / да не уклонимся в
распутия греховная, / но, Тобою направляеми,
достигнем вечнаго Горняго отечества.

Песнь 6

*Ирмос: Житейское море, / воздвигаемое зря /
напастей бурю, / к тихому пристанищу
Твоему притек, вопию Ти: / возведи от тли
живот мой, // Многомилостиве.*

Страх Божий основание в сердце твоём положив
/ и в послушание отцу твоему духовному всего
себе предав, / многия добродетели стяжал еси,
славне Романе.

Мрежу словесную в житейское море ввергнув, /
яко рыбы, многия души уловил еси, славне
Романе, / и, яко ловец премудр, от тины
страстей и бездны греховныя избавил я еси.

Пастыря Кронштадтскаго ученик быв, отче
Романе, / многия духовныя плоды принесл еси
Христу. / Ныне же, во Царствии Небеснем
пребывая, / помяни и нас, подвиги твоя
прославляющия.

Богородичен: Якоже раб в стране чуждей
помышляет о отечестве своем, / тако и аз,
страстей раб, на Небо взирая, взываю Ти,
Богородице: / возьми от мене бремя тяжкое
греховное / и свободи от страстей душу мою, /
Сыну Твоему всем сердцем и душою работати
желающаго.

Кондак, глас 2:

Восхвалим, вернии, / изряднаго во священницех
/ и славнаго во исповедницех / Романа
досточуднаго, / Православия поборника, /
благочестия ревнителя, / земли Русския красное
прозябение, / града Москвы похвалу и
украшение, / иже, страданием Небесе достиг, /
тепле молит Христа Бога / спастися душам
нашим.

Икос:

Приспе день духовнаго торжества в памяти
святаго исповедника Романа, / той бо, во
священстве благочестно пожив, / образ верным
в терпении и скорбех яви / и венец
исповеднический от Господа прият, / темже и
похвалами венчается сими:
Радуйся, на путь священства от Кронштадтскаго
пастыря наставленный;
радуйся, во мнозех градех и весех веру Христову
проповедавый.
Радуйся, за веру Православную пострадати
сподобивыйся;
радуйся, мощи твоя, яко дар священный, земли
Московстей во утверждение веры оставивый.
Радуйся, Романе, теплый наш заступниче и в
скорбех скорый помощниче.

Песнь 7

Ирмос: Росодательну убо пещь / содела Ангел / преподобным отроком, / халдеи же опаляющее / веление Божие / мучителя увеща вопити: // благословен еси, Боже отец наших.

Святителя Тихона верный ученик был еси, святе Романе, / егда во дни юности мудрость духовную во граде Холмстем постигнути восхотел еси. / Темже и при кончине живота твоего / душу твою вкупе с ним за Господа положил еси.

Священства чистыми лучами / от пресветлых звезд, праведных Иоанна Кронштадтскаго и Алексия Московскаго просветился еси, славне. / С ними же вкупе паству Христову добре упасл еси / и к свету невечернему управил еси.

Прохладою духоносных словес твоих, богомудре, / остудил еси пламень мятежа, / егоже нецьи воины на корабли устроиша. / Темже, и огня вечнаго сих избавив, / мир и тишину в сердца их вселил еси.

Богородичен: Почто, душе моя, греху работаеши, / почто страстей плотских раба бываеши, / невозможно бо двема господинома работати, глаголет Писание, / невозможно Господа любити и стражем служити, / но возопий к Богородице, / да умолит о тебе Сына Своего, Христа Бога нашего.

Песнь 8

Ирмос: Из пламене преподобным росу источил еси / и праведнаго жертву водою попалил еси, / вся бо твориши, Христе, токмо еже хотети. // Тя превозносим во вся веки.

Дух мирен стяжав, Романе блаженне, / в уничижении и славе, в темницах и на горьких работах Бога всегда благодарил еси, / яко Подателя всех благ и Спасителя душ наших. Препоясав, яко воин, чресла твоя истиною, / облеклся еси в броню правды, отче Романе, / веру же Христову, яко щит восприим, / мечем духовным тшетная шатания безбожных посека еси, / сего ради приял еси венец нетленный. Подвизався в добром исповедании веры, богомудре Романе, / яко злато, в горниле страданий очищен был еси. / Ныне же, яко звезда пресветлая, сияеши во Царствии Небеснем.

Троичен: В Триех Лицех богословим Тя, Святая Троице, / Отца, и Сына, и Духа Святаго, / Божество Единосущное и Нераздельное.

Песнь 9

Ирмос: Бога / человеком невозможно видети, / на Негоже не смеют чини ангельстии взирати, / Тобою же, Всечистая, явися человеком / Слово воплощенно, / Егоже величающе, // с

Небесными вои Тя ублажаем.

Любовию отчею, яко чад твоих, всех нас
объемлещи, святе, / и, яко дерзновение ко
Господу стяжав, / усердно молиши Его, да
спасет души наша.

Закону естества повинуюся, зашел еси яко
солнце, священне Романе, / ныне же паки
восстал еси в явлении цельбоносных мощей
твоих, / яже лобызающе, Христа прославляем.
Житие многотрудное прошед и законно
подвизався, чудне Романе, / от Христа приял
еси венец нетленный и благоуханный. / Мы же
восхваляюще тя и к раце мощей твоих
притекающе, / любовию память твою ублажаем.
Богородичен: Все упование мое на Тя возлагаю,
Мати Божия, / буди ми Ходатаица пред Сыном
Твоим / и Надежда в день лютаго испытания.

Светилен:

Яко луч солнца посреде нощи явися житие твое,
святе Романе, / тьму неверия отгоняя и путь во
след Христа идущим освещая, / и терпению в
скорбех научая. / Моли непрестанно о всех нас.

Слава, и ныне, Богородичен:

Под Твою милость прибегаем, Богородице Дево,
/ молитв наших не презри в скорбех, / но
избави нас от них, / едина Чистая и
Благословенная.

На хвалитех стихиры, глас 6.

Подобен: Что вас наречем:

Добродетели многия стяжав в житии твоём, /
чистоту, целомудрие и кротость, / милосердие,
терпение и веру, / над всеми же сими любовь
нелицемерну, / и теми, яко лествицею
духовною, / возшел еси к высоте небесней, /
святе исповедниче Романе, / ныне же тамо
радуешься, // обретый мзду трудов твоих.
Гонению лютому на земли Русстей
утвердившуся, / в уныние не пришел еси, /
Романе терпеливодушне, / ниже мучителей
убоялся еси, / но, верный сын патриарха Тихона
явився, / паству Московскую духовне окормлял
еси. / Ныне вкупе с ним Престолу Божию
предстоиши // и молишися о спасении душ
наших.

Божественным Духом просвещаемь, / на гору
добродетелей возшел еси, / тишиною и миром
духовным сердце твое исполнивый, / многия
люди ко Христу привел еси / и, во одежду
исповедничества облекся, / достоин Зовущему
тя явился еси. / Сего ради обрел еси вечное
блаженство, // Романе священне отче наш.

Слава, глас 8:

Тя, всехвальне Романе, / ни скорбь, ни теснота,
ни глад, / ниже гонения, ниже раны /
возмогша от Бога разлучити, / но, паче

разгоревся к Нему любовью, / истину Христову
пред человеки исповедал еси. / Сего ради
Господь по словеси Своему // прослави тя во
Царствии Небеснем.

И ныне, Богородичен, глас тойже.

Подобен: О, преславнаго чудесе:

О, преславнаго чудесе! / Небесе и земли Царица,
/ от святых сродников наших умоляемая, / до
ныне землю русскую покрывает / и лика Своего
изображении милостивно обогащает. / О,
Владычице Державная, / не престани и на
будущее время / во утверждение на Руси
Православия // милости и чудеса изливати до
века. Аминь.

На Литургии

Блаженны от канона, песнь 3-я и 6-я.

Прокимен, глас 7: Восхвалятся преподобнии во
славе / и возрадуются на ложах своих.

Стих: Воспойте Господеви песнь нову, хваление
Его в церкви преподобных.

Апостол ко Ефесеем, зачало 233.

Аллилуия, глас 6: Блажен муж, бояйся Господа, в
заповедех Его восхощет зело. Стих: Сильно на
земли будет семя его.

Евангелие от Луки, зачало 64.

Причастен: В память вечную будет праведник,
от слуха зла не убоится.

[Служба святому священноисповеднику Роману (Медведю) пресвитеру, Московскому, во иночестве Иосифу (†1937, память 21 июля и 26 августа) воспроизводится по книге: Житие священноисповедника Романа (Медведя) 1874–1937. Тверь: изд-во «Булат», 2015. Служба на стр. 103 – 119]

